



Tengku akan Disambut dengan Meriahnya

Perdana Menteri Persekutuan Tanah Melayu, Tengku Abdul Rahman Putera al-Haj, yang akan tiba pada pertengahan bulan Jun, akan disambut dengan meriahnya.

Segala lapisan rakyat Persekutuan akan keluar menyambut Tengku pada hari itu kerana kejayaannya menyampaikan suara bantahan rakyat Tanah Melayu kepada dunia tentang dasar membeza-bezakan warna kulit yang diamalkan oleh Afrika Selatan. Tengku telah membentangkan soal itu dalam persidangan negara-negara *Commonwealth* di London pada bulan yang lalu.

Johor Membayar Tambang Pegawai-pegawaiinya yang Hendak Menunaikan Fardu Haji

Kerajaan Johor telah mengeluarkan sebanyak \$30,000 kerana perbelanjaan tambang pegawaiannya yang pergi menunaikan fardu haji tahun ini. Sebanyak 27 orang pegawai kerajaan Johor telah berpeluang belayar ke tanah suci baharu-baharu ini.

Pengarah Dewan Bahasa ke Amerika

Tuan Syed Nasir bin Ismail, Pengarah Dewan Bahasa dan Pustaka telah berlepas ke Amerika pada 22 Mei yang lalu, atas undangan Jabatan Negara Amerika dan akan tinggal di sana selama dua bulan. Beliau telah membawa bersama-sama buku-buku Melayu,

rakaman-rakaman lagu-lagu Melayu dan gambar-gambar pemandangan di Persekutuan untuk Jabatan Pengajian Tenggara Asia di universiti-universiti Cornell dan California. Kedua-dua universiti ini mempunyai Jabatan Pengajian Bahasa dan Kebudayaan Melayu.

Tuan Syed Nasir akan melawat *kutub khānah* Kongres untuk mengkaji cara pertadbirannya sebagai panduan untuk mengadakan kutub khanah kebangsaan di tanah air.

Tengku Mahkota Naik Haji

Tengku Mahkota Johor, Tengku Mahmud dan isterinya Cik Kalthum telah berangkat menunaikan fardu haji. Yang teramat mulia ialah Tengku Mahkota yang pertama sekali dalam sejarah tanah air yang telah berangkat ke tanah suci.

Tengku Mahmud suami isteri telah berlepas dengan kapal terbang dari Singapura dengan diiringi oleh Mejar Yahya bin Yusuf dan Dato' Haji Abdul Jalil Hasan Naib Mufti Johor.

Bantuan untuk Sekolah-sekolah Agama

Menurut keterangan Menteri Pelajaran Persekutuan, A. Abdul Rahman Talib, bahawa Kementerian Pelajaran akan berikhtiar menambahkan peruntukan wang bantuan untuk sekolah-sekolah agama (sekolah-sekolah rakyat) sehingga berjumlah \$500,000 dalam tahun 1961.

Rancangan Luar Bandar

Azam kerajaan Persekutuan untuk menjayakan Rancangan Kemajuan Luar Bandar telah ditegaskan oleh Pemangku Perdana Menteri Tun Abdul Razak bin Hussein.

Tujuan kerajaan, kata beliau, ialah untuk memberi jaminan bahawa tiap-tiap penduduk luar bandar akan mencapai taraf hidup yang sesuai dengan kekayaan negeri ini.